



XALQ DEPUTATLARI TOYLOQ TUMANI KENGASHINING QARORI

2024-yil 1-aprel

VI-89-38-7-104-K/24

Toyloq tumani

Xalq deputatlari tuman Kengashi deputatlari tomonidan o'z saylovchilari oldida axborot berish bo'yicha tartibini tasdiqlash to'g'risida

O'zbekiston Respublikasi Oliy Majlisi Senati mahalliy hokimiyat vakillik organlari faoliyatini kuchaytirishga ko'maklashuvchi komissiyasining 2024-yil 31-yanvardagi "Mahalliy Kengashlar deputatlari faoliyati samaradorligini oshirish to'g'risida"gi 22-sonli Qaroriga, O'zbekiston Respublikasi Oliy Majlisi Senati mahalliy hokimiyat vakillik organlari faoliyatini kuchaytirishga ko'maklashuvchi komissiyasining 2024-yil 2-fevraldagi 22-04/444-sonli xatiga, hamda O'zbekiston Respublikasi "Mahalliy davlat hokimiyati to'g'risida"gi Qonunining 6- va 24-moddalariga asosan, xalq deputatlari tuman Kengashining sakson to'qqizinchi sessiyasi

QAROR QILADI:

1. O'zbekiston Respublikasi Oliy Majlisi Senati mahalliy hokimiyat vakillik organlari faoliyatini kuchaytirishga ko'maklashuvchi komissiyasining 2024-yil 31-yanvardagi "Mahalliy Kengashlar deputatlari faoliyati samaradorligini oshirish to'g'risida"gi 22-sonli Qarori ma'lumot va ijro uchun qabul qilinsin.

2. Xalq deputatlari tuman Kengashi deputatlari tomonidan o'z saylovchilari oldida axborot berish tartibi ilovaga muvofiq tasdiqlansin.

3. O'zbekiston Mahallalar uyushmasi tuman bo'limi (A.Mirzayev)ga:
mahalla fuqarolar yig'ini raislari belgilangan Reja-grafik bo'yicha xalq deputatlari tuman Kengashi deputatlari tomonidan o'z hududida istiqomat qiluvchi saylovchilariga deputat axborot beradigan joy va vaqtini xabardor qilib borsin.

4. Xalq deputatlari tuman Kengashi deputatlik guruhi rahbarlari, tuman hokimligi bilan birgalikda xalq deputatlari tuman Kengashi deputatlari tomonidan o'z saylovchilari oldida axborot berish bilan bog'liq tashkiliy masalalarni hal etish hamda amalga oshirilgan ishlar to'g'risidagi ma'lumotlarni belgilangan tartibda xalq deputatlari tuman Kengashi kotibiyatiga taqdim etib borish topshirilsin.

5. Xalq deputatlari tuman Kengashi kotibiyatiga:
xalq deputatlari tuman Kengashi deputatlik guruhi rahbarlari tomonidan taqdim etilgan ma'lumotlarni umumlashtirish hamda aniqlangan mavjud muammolarni bartaraf

etish maqsadida har chorakning yakuni bilan xalq deputatlari tuman Kengashi sessiyasi muhokamasiga kiritib borish topshirilsin.

6. Tuman hokimining o‘rinbosarlari (J.Xujamurodov, J.Haqberdiyev, S.Eraliyev, Sh.Xaydarov, B.Sanaqulov, N.Kambaridinova) va aloqador tashkilotlar bilan birgalikda:

saylovchilar tomonidan bildirilgan tuman, mahalla miqyosida yechilishi mumkin bo‘lgan mavjud muammolarni belgilangan tartibda ijobiy hal etib borish;

viloyat darajasida hal etilishi mumkin bo‘lgan muammolarni tegishli tartibda viloyat idoralariga taqdim etib borish vazifalari yuklatilsin.

7. Tuman hokimligi axborot xizmati (N.Raxmatova) hamda “Qo‘shchinor” gazetasi tahririyati (M.Yuldashova) deputatlarning saylovchilar bilan uchrashuv o‘tkazish joyi hamda vaqti to‘g‘risidagi ma’lumotlarni tuman hokimligining rasmiy veb-sayti va ijtimoiy tarmoqlarda e’lon qilib borish tavsiya etilsin.

8. Mazkur qarorning ijrosini nazorat qilish xalq deputatlari tuman Kengashining doimiy komissiyalari raislari zimmasiga yuklatilsin.

Sessiya raisi



YULDASHOVA
MUTABAR
ABDUMANONOVNA

**Xalq deputatlari tuman Kengashi deputatlari tomonidan o‘z saylovchilari oldida
axborot berish**

TARTIBI

I-bob. Umumiy qoidalar.

1. Mazkur tartib O‘zbekiston Respublikasining Konstitutsiyasi, “Mahalliy davlat hokimiyati to‘g‘risida”gi va “Xalq deputatlari viloyat, tuman va shahar Kengashi deputatining maqomi to‘g‘risida”gi O‘zbekiston Respublikasi qonunlariga muvofiq ishlab chiqilgan bo‘lib, xalq deputatlari tuman Kengashi deputatining saylovchilarga o‘z faoliyati to‘g‘risida axborot berishining tartib-taomillarini belgilaydi.

2. Deputatning saylovchilarga o‘z faoliyati to‘g‘risida axborot berishidan asosiy maqsad - uning o‘z saylovchilari oldidagi mas‘uliyatini va hisobdorlik hissini oshirish, deputatlik faoliyatining ochiqligini, aholining xabardorligini kuchaytirish va pirovardida xalqning vakillik organlariga bo‘lgan ishonchini mustahkamlashdan iborat.

3. Deputat vaqti-vaqti bilan, lekin yiliga kamida to‘rt marta saylovchilarga o‘z faoliyati to‘g‘risida axborot beradi.

II-bob. Deputat faoliyati to‘g‘risidagi axborot berishni tashkil etish.

4. Xalq deputatlari tuman Kengashi tomonidan har chorakning birinchi sessiyasida deputatlarning saylovchilar oldida o‘z faoliyati to‘g‘risida axborot berishi bo‘yicha Reja-grafigi muhokama qilinadi va tasdiqlanadi.

Reja-grafik har bir deputatning taklifiga binoan xalq deputatlari tuman Kengashi kotibiyati tomonidan shakllantirilib, unda axborot beriladigan hudud va vaqt ko‘rsatiladi.

Deputatlar o‘z xohishiga ko‘ra saylovchilar oldida o‘z faoliyati to‘g‘risida Reja-grafikdan tashqari ham axborot berishi mumkin.

5. Tasdiqlangan Reja-grafik xalq deputatlari tuman Kengashi kotibiyati tomonidan siyosiy partiyalar va mahalliy ijroiya hokimiyati organlariga yuboriladi.

6. Deputat saylovchilarga o‘z faoliyati to‘g‘risidagi axborotini berishni tashkillashtirish maqsadida uning iltimosiga ko‘ra ijro etuvchi hokimiyat organlari bino ajratilishini tashkil etadilar, saylovchilar bilan uchrashuv o‘tkaziladigan joy va vaqt haqida fuqarolarga xabar beradilar, uchrashuvda ishtirok etish uchun deputatning taklifiga binoan o‘zlarining mas‘ul vakillarini yuboradilar.

7. Mahalliy ijroiya hokimiyati organi:

deputatning o‘z saylovchilari bilan uchrashuvini o‘tkazishi uchun saylovchilar kelishiga qulay bo‘lgan joy ajratilishni ta‘minlaydi.

deputatning o‘z saylovchilari oldida axborot berishi to‘g‘risida ushbu deputat saylangan hududidagi mahalla fuqarolar yig‘inlarini uchrashuvdan kamida yetti kun oldin yozma ravishda ogohlantiradi.

8. Mahalla fuqarolar yig'ini raislari tomonidan uchrashuv haqida o'z hududida istiqomat qiluvchi saylovchilarga deputat axborot beradigan joy va vaqt haqida uchrashuvdan kamida uch kun oldin e'lon qilinadi.

9. Deputatning saylovchilar bilan uchrashuv o'tkazish joyi va vaqti haqidagi ma'lumotlar hududdagi ommaviy axborot vositalarida, siyosiy partiyalarning hamda xalq deputatlari tuman Kengashining rasmiy veb-saytlari va ijtimoiy tarmoqlardagi sahifalarida, shuningdek, deputatning ijtimoiy tarmoqlardagi shaxsiy sahifalarida e'lon qilib borilishi mumkin.

10. Deputat saylovchilar bilan uchrashuvda o'z faoliyati to'g'risidagi axborotning mazmunidan kelib chiqqan holda hududdagi tegishli davlat organlari va tashkilotlariga ko'rib chiqiladigan masalalar bo'yicha mas'ul xodimlar ishtirokini ta'minlash haqida xat yuboradi.

III-bob. Deputatning o'z faoliyati to'g'risidagi axborotiga qo'yiladigan talablar

11. Deputat axborotidagi ma'lumotlar ishonchli va asoslangan bo'lishi, barcha uchun tushunarli, sodda hamda ravon tilda berilishi talab etiladi.

Deputatning axborotida statistik ko'rsatkichlar, foto va video materiallar o'rin egallashi mumkin.

12. Deputatning o'z faoliyati to'g'risidagi axborotida quyidagilar bo'lishi mumkin: deputatning saylovoldi dasturi ijrosi yuzasidan qilingan ishlar;

mahalliy davlat hokimiyati organlariga yuborilgan deputat so'rovlari, murojaatlar hamda ularning ijrosi yuzasidan amalga oshirilgan ishlar haqidagi ma'lumotlar;

xalq deputatlari tuman Kengashi sessiyasida hududiy davlat organlari mansabdor shaxslarining hisobot (axborot)larini eshitish va eshituv yakunlari bo'yicha erishilgan natijalar haqidagi ma'lumotlar;

hududdagi davlat organlari va tashkilotlari hamda fuqarolarning o'zini o'zi boshqarish organlari va boshqa mutasaddi tashkilotlar bilan hamkorlik aloqalari to'g'risidagi ma'lumotlar;

norma ijodkorligi faoliyati to'g'risidagi axborot;

deputatning aholi murojaatlari bilan ishlash holati yuzasidan qilingan ishlari haqidagi ma'lumotlar;

o'z saylov hududida axborot davri mobaynida amalga oshirgan ishlari to'g'risidagi, shuningdek, oldingi uchrashuv yakuni bo'yicha davlat organlari va tashkilotlariga yuklatilgan vazifalarning ijrosi haqidagi ma'lumotlar;

o'z saylov okrugidagi ijtimoiy, iqtisodiy, ekologik, maishiy va boshqa muammolar, ularni bartaraf etish bo'yicha rejalar;

navbatdagi axborot berish davrigacha bo'lgan muddatda amalga oshiriladigan ishlar.

13. Deputat axboroti qoida tariqasida davlat tilida beriladi, agar u saylangan hudud aholisining katta qismini boshqa millat vakillari tashkil etgan taqdirda o'sha hudud aholisi so'zlashadigan tilda ham bo'lishi mumkin.

IV-bob. Deputatning saylovchilar oldida o'z faoliyati to'g'risidagi axborotini berish tartib-taomillari

14. Deputatning o‘z faoliyati to‘g‘risida axborotini berish jarayonida saylovchilar, o‘zi nomzod etib ko‘rsatilgan siyosiy partiya vakillari, shuningdek, uning taklifi bilan hududdagi davlat organlari va tashkilotlari hamda fuqarolarning o‘zini o‘zi boshqarish organlari xodimlari, jamoatchilik vakillari, OAV va boshqalar ishtirok etishlari mumkin.

15. Deputat saylovchilarga axborot berishni boshlashdan oldin uchrashuvda ishtirok etayotgan shaxslar haqida ma‘lumot beradi hamda uchrashuv bayonnomasini yuritish uchun vakil tayinlaydi.

Uchrashuvda qayd etilgan har bir masala bayonnomaga kiritib boriladi hamda yig‘ilishdan so‘ng deputat tomonidan tasdiqlanadi.

16. Deputat axborot berish jarayonida o‘zi saylangan hududdagi mavjud muammolarni hal etish choralarini ko‘rish bo‘yicha ishtirok etayotgan tegishli davlat organlari va tashkilotlari xodimlarining fikrini eshitadi hamda muammolarni bartaraf etish choralarini muhokama qiladi.

Deputat axborotini eshitish davomida saylovchilar o‘z hududidagi dolzarb muammolar yuzasidan fikr bildirishlari va ularni bartaraf etish bo‘yicha taklif berishlari mumkin.

17. Uchrashuv davomida saylovchilar tomonidan ko‘tarilgan muammo aholining moddiy, ijtimoiy, iqtisodiy va shu kabi boshqa holatlari bo‘yicha qayd etilganda, shuningdek, zudlik bilan chora ko‘rilishi talab qilinadigan holatlarda deputat tegishli davlat organi va tashkilotiga (uning mansabdor shaxsiga) “Xalq deputatlari viloyat, tuman va shahar kengashi deputatining maqomi to‘g‘risida”gi Qonunga asosan deputat so‘rovi yoki murojaat yuboradi.

V-bob. Uchrashuvda saylovchilar tomonidan ko‘tarilgan masalalarni xalq deputatlari tuman Kengashiga kiritish va ularning ijrosini nazorat qilish

18. Deputat tomonidan tasdiqlangan bayonnoma xalq deputatlari tuman Kengashi kotibiyatiga taqdim etiladi.

Deputatlar taqdim etgan bayonnomalarni xalq deputatlari tuman Kengashi kotibiyati tomonidan tahlil etilib, xalq deputatlari tuman Kengashi sessiyasi majlisiga kiritilishi mumkin bo‘lgan muammoli masalalar sohalar kesimida ajratilgan holda yig‘iladi. Bunda har bir oy uchun alohida ma‘lumot shakllantiriladi.

19. Xalq deputatlari tuman Kengashi kotibiyati yig‘ilgan muammoli masalalarni hal etish bo‘yicha Kengash qarori va chora-tadbirlar rejasini ishlab chiqadi hamda tasdiqlash uchun belgilangan tartibda xalq deputatlari tuman Kengashning navbatdagi sessiyasi muhokamasiga kiritilishini tashkil qiladi.

20. Xalq deputatlari tuman Kengashi tomonidan qabul qilingan qaror ijro qilish uchun o‘n kunlik muddatda tegishli davlat organlari va tashkilotlariga ro‘yxat asosida yuboriladi.

21. Tegishli davlat organlari va tashkilotlari qarorda belgilangan topshiriq ijrosi bo‘yicha ko‘riladigan zarur choralar va amalga oshiriladigan ishlar haqida xalq deputatlari tuman Kengashiga ma‘lumot kiritib boradi.

22. Xalq deputatlari tuman Kengashi qarori bilan mas'ul etib belgilangan xalq deputatlari tuman Kengashi doimiy komissiyasi va deputatlar davlat organlari va tashkilotlari tomonidan uning ijro etilishi bo'yicha nazoratni amalga oshiradi.

23. Deputatlar tomonidan axborot berish jarayonida aniqlangan muammoli masalalar viloyat yoki respublika darajasida hal etilishi talab etilgan taqdirda, xalq deputatlari tuman Kengashlari bu haqida tegishincha xalq deputatlari viloyatlar va Toshkent shahar Kengashiga yoki Oliy Majlis palatalarining shu hududdan saylangan deputat va senatorlariga murojaat qilishi mumkin.

VI-bob. Yakunlovchi qoidalar

24. Deputatning o'z faoliyati to'g'risidagi axboroti ommaviy axborot vositalarida, siyosiy partiyalarning hamda xalq deputatlari tuman Kengashining ijtimoiy tarmoqlardagi sahifalarida e'lon qilib boriladi.

25. Saylovchilar deputatning o'z faoliyati to'g'risidagi axborotidan qoniqmagan taqdirda, deputatni chaqirib olish uchun qonun hujjatlarida belgilangan tartibda xalq deputatlari tuman Kengashiga yoki siyosiy partiyalarga murojaat qilishlari mumkin.